


Watty Vos:

"Polis den bario ta mas cerca di nos"



ORANJESTAD (AAN): Un di e componentenan di e 'PLAN DI BARIO' di partido AVP pa desaroio di Aruba den e benidero añanan ta e presencia di polis den barionan. Na comienzo di e aña aki caba Minister di Husticia Watty Vos a menciona e programa special di cuerpo di polis, pa trece polis mas cerca di e habitantenan di e bario y pa haci acceso di polis na comunidad y vis a versa mas directo. El a bisa: "Ora un polis conoce un bario y su habitantenan y e habitantenan conoce esnan cu tey pa cuida nan seguridad, e cooperacion directo aki ta hiba na un prevencion di cualkier forma di delincuencia mas efectivo y sin malentendimiento. Esey ta un di e metanan importante di e polis den bario cu ta parti di e Plan di Bario cu nos ta presenta awe."

Pa por ehecuta e program di 'polis den bario' aki, mester a reforza cuerpo di polis mas pa despues asigna polisnan pa e barionan.

Riba esaki y 'Plan di Bario' Minister Watty Vos a declara lo siguiente: "Nos mester evita cu hobennan por cai den criminalidad door di bin cu programanan riba tereno di prevencion di

criminalidad. E programanan di prevencion aki, ademas di stimula e actividadnan di deporte pa motibo di e balor di formacion di deporte pa e ser humano, lo introduci e 'neighborhood watch' y e 'polis di bario'. E polis cu ta pasa den e bario, cu nos conoce di antes tempo cu nos tabata hoben. Bo tabata weita con polisnan tabata pasa den bario y tur mucha tabata conoce e polis aki y por a cuminde."

"Hasta nos a custumbra cu ora cu bo ta hasi cos di malcria, hendenan grandi tabata bisa bo 'cuidao ora polis pasa mi ta bise hiba bo'. Anto e ora ey abo como hoben, ta tene cuenta cu esey pa bo no hasi coy malcria. Loke a pasa ta cu cierto forman di anda cu otro cu tabata crea e sentido di balor y normanan cerca nos, a bay perdi. Balornan cu nos mester bay recupera pasobra den e balornan aki nos rikeza ta sinta. E rikeza cu miembronan di e bario ta siña conoce otro mas."

"Por ehempel e forma cu antes ora bo ta bay biba den un bario nobo, prome cos cu bo tabata hasi ta sera conoci cu e bisñanan. Esaki ta algo cu a bay

for di moda den nos comunidad. Nos mester trece bek e armonia cu nos semper a biba den dje."

CAMBIONAN MANERA NOS MES KIER: Segun Minister Watty Vos nos mester dirigi e desaroio di nos comunidad y no bira victima di desaroionan: "Desaroionan a cambia e circunstancianan di bida y a exigi for di nos cu nos mester biba cu otro. Pero nos por cambia cosnan na nos fabor tambe y haci bida manera nos ta deseé. Ta pesey nos ta bin cu e Plan di Bario y cu e 'neighborhoodwatch'. E desaroio economico a trece cune peligernan di bida cu Bo ta haya tur parti di mundo. Pa nos evita cu esaki continua nos mester tin un bon cooperacion den cada bario y ta pesey nos kier enfatisa e 'neighborhoodwatch' y e polis di bario, caminda cu tur e personan cu ta biba den e bario ta biba hunto, ta tira bista pa otro y cu Bo por cai bek tambe ariba otro. Asina ey e bario lo wordo manteni sano y wordo protehi.

Esaki ta loke nos ta bay haci den tur bario."

"Pesey nos ta aumentando e cantidad di miembronan di cuerpo di polis. Nos tin awor aki den school di polis un record di person. Nos tin 11 persona cu ta birando aspirant cu ta gradua proximamente. Nos tin como 54 miembro di cuerpo cu ta drenta cuerpo di biaha e aña aki. Esaki ta sin menciona esnan cu a gradua caba e aña aki, otronan di Aruba cu nos a haya di Hulanda y otro diez polisnan cu a bin di

Hulanda. Nan lo keda te ora cu nos ta cla pa sigui completamente riba nos propio forza. Y ainda tin disponibel hopi di nan cu kier bin Aruba bin yuda nos. Di e forma aki nos lo percursa pa polis ta den tur parti di nos isla y den tur bario di nos pais, di dia y anochi. Hunto cu tur e otro aspectonan di e Plan di Bario, nos lo percursa pa halza e calidad di bida, e satisfaccion di biba den un bario sigur, nechí y cu tur e facilidadnan pa nos y nos yiunan crece hunto y sano."